

Protocol dalla radunonza communal dils 27 da november 2015 allas 20.15 uras en casa da scola a Breil-vitg

Perstgisas: Selda Cavegn, geraua
Prisca Sgier, cussegliera
Augustin Cathomen
Daniela Seiler, anteriura geraua

Presenza: 66 personas

Tractandas:

1. Beinvegni ed approbaziun dil protocol dalla radunonza dils 24 da zercladur 2015
2. Preventiv e quen d'investiziun 2016
3. Pei da taglia 2016
4. Approbaziun statuts dalla regiun Surselva
5. Varia

Beinvegni ed avertura

Il president communal, Clau Schlosser, fa a tuts presents in cordial beinvegni ed orientescha la radunonza partenent entgins fatgs actualmein en elaboraziun. Denter auter menziunescha el il stan da baghegiar dils stabiliments Bostg e ch'il passadi Spineus hagi finalmein saviu vegnir construius. Igl 1 da settember 2015 ha il niev selvicultur, Marc Bundi, entschiet en tier la vischnaunca, el remplazza il Wendelin Hürlimann.

Il president communal informescha la radunonza ch'ils stabiliments da militar vegnien duvrai vinavon e quei silmeins aunc els proxims 10 onns. Quella informaziun ei vegnida confirmada dil cusseglier guvernativ Christian Rathgeb. Vinavon informescha el la radunonza, che las vischnauncas d'Andiast e da Vuorz seigien vid ellaborar ora in project da fusiun. Informaziuns pli detagliadas suondan el decuors dalla primavera 2016.

Il Circus Nock vegn si Breil denter ils 14 – 18 d'uost 2016. Las producziuns ein planisadas ils 16 e 17 d'uost 2016.

Sco dumbravuschs vegnan Maurus Cathomas, Breil e Wendelin Hürlimann, Breil, nominai ed elegi unanim.

La gliesta da tractandas, ch'ei stada publicada els davos fegls ufficials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

1. Approbaziun dil protocol dalla radunonza communal dils 24 da zercladur 2015

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol vegn per consequenza approbaus entras tscherna unanima.

2. Preventiv e quen d'investiziun 2016

Il preventiv siara suenter expensas da frs. 8'851'500.00 ed entradas da frs. 8'856'650.00 cun in surpli entradas ell'altezia da frs. 5'150.00. Las amortisaziuns previdas muntan a frs. 1'050'000.00. Il quen d'investiziun preveda expensas da frs. 1'415'000.00 ed

entradas da frs. 610'000.00. Las investiziuns netto muntan per consequenza a frs. 805'000.00.

Il president communal resumescha il preventiv dil quen current sco era il quen d'investiziun e dat sclariments necessaris tier diversas posiziuns. Allas damondas tschentadas vegn dau cuortamein risposta. Ils presents approbeschan il preventiv sco era il quen d'investiziun 2016 cun tscherna unanima e senza resalvas.

3. Pei da taglia 2016

La suprastonza communal ed il cussegl da vischnaunca ein sefatschentai cun la damonda e proponan alla radunonza communal da schar il pei da taglia ordinari sco tochen dacheu, v.d. sin 100% dalla taglia cantunala semplia. Era il pei dalla taglia sin schischom duei restar sco tochen dacheu sin 1.7%o.

Las damondas vegnan suttamessas alla discussiun. Da tala vegn buca fatg diever. Cun tscherna unanima decida la radunonza communal da fixar il pei da taglia ordinari sin 100% dalla taglia cantunala semplia ed il pei dalla taglia sin schischom sin 1.7%o.

4. Approbaziun statuts dalla regiun Surselva

Il pievel grischun ha approbau ils 30 da november 2014 la legislaziun adesiva davart la refuorma territoriala. Aschia remplazzan las endisch regions naven digl onn 2016 ils cumins, las corporaziuns regionalas ed ils districts. Las 18 vischnauncas dalla Surselva fuorman da niev la regiun Surselva. La nova regiun Surselva dispona da 21'347 habitonts.

Il president communal informescha sur dallas midadas en ils statuts e dat liber la discussiun. Dalla discussiun vegn buca fatg diever. Ils novs statuts vegnan approbai cun tscherna unanima e senza resalvas.

5. Varia

Il president communal engrazia a Richard Caduff che ha duront 12 onns presidiau la vischnacuna da Breil, vinavon engrazia el ad Eugen Friberg che ei medemamein staus 12 onns sco era a Daniela Seiler che ei stada duront 6 onns en suprastonza. El engrazia per la buna collaboraziun e la buna lavur ch'els han prestau. In special engraziament admetta el al president communal partent per siu grond engaschi e siu quitau per la vischnaunca. Star avon seigi oz buca sempel e pretendi grond engaschi e bien quitau, e dalla critica vegni ins buca schanegiaus.

Nies selvicultur Wendelin Hürlimann ei ius ils 31 d'october 2015 en sia meritada pensiun. Suenter 36 onns en survetsch per la vischnaunca da Breil engrazia il president communal per siu nunstunchlenteivel engaschi en tut ils secturs.

Clau Schlosser engrazia per la presenza, la participaziun e la confidonza e siara la radunonza allas 21.00 uras, giavischond in bi temps d'advent sco era ina buna finiziun digl onn vegl.

Breil, igl 1 da december 2015

Il president



Igl actuar

